
Saksnr: 2021/2254-49
Saksbehandlar: Ida-Beate Mølmesdal

Saksgang

Utval	Utv.saksnr.	Møtedato
Fylkesutvalet		24.08.2021

Vedtak planprogram - Regional plan for klima

Forslag til vedtak

1. Planprogram for Regional plan for klima vert vedteke slik det ligg føre.
2. Fylkeskommunedirektøren får fullmakt til å invitere til, og etablere dei ulike gruppene som skal delta i utarbeiding av planen. Politisk samarbeidsgruppe vert leia av fylkesordførar/varaordførar.

Samandrag

Fylkeskommunedirektøren legg fram forslag til vedtak av planprogram for Regional plan for klima 2022-2035. Det kom inn 33 høyringsinnspel til planprogrammet, i tillegg til munnlege tilbakemeldingar i høyringsmøta og regionalt planforum.

Oppsummering av høyringsinnspela, og korleis desse vert følgt opp ligg i vedlagte høyringsrapport. Vesentlege endringar, presiseringar og definisjonar som er skrive inn i vedtaksutkastet er presentert i innleiinga til høyringsrapporten. Dette gjeld innspel om:

- ✓ Energisparing
- ✓ Karbonopptak, fangst og lagring
- ✓ Medverknadsprosess
- ✓ Klimavenleg landbruk
- ✓ Arealrekneskap
- ✓ Andre regionale planar

Rune Haugsdal
fylkeskommunedirektør

Paal Fosdal
avdelingsdirektør

Saksframlegget er godkjent elektronisk og har difor inga handskriven underskrift

Vedlegg

- 1 Vedtaksutkast Planprogram - Regional plan for klima
- 2 Høyringsrapport - Regional plan for klima
- 3 Vedlegg - Ettersendt uttale etter frist

Saksutgreiing

Bakgrunn for saka

Utviklingsplan for Vestland 2020-2024, viser at Vestland har høge ambisjonar innanfor klima og miljø. Fylkeskommunen som regional planmynde skal utarbeide regionale planar for spørsmål som er fastsett i regional planstrategi, og utarbeiding av ein felles klimaplan for Vestland er ei prioritert planoppgåve i perioden.

Fylkesutvalet vedtok å legge ut høyringsutkastet til planprogram på høyring i møtet 20. april. Høyringsfristen var 18. juni.

Høyringsutkastet blei sendt ut til 199 høyringsinstansar til uttale. Det kom inn 33 skriftlege høyringssvar, i tillegg til munnlege tilbakemeldingar i høyringsmøta og planforum.

I høyringsperioden blei det arrangert ulike digitale høyringsmøte for å informere om høyringsutkastet, samt hente inn innspel frå ulike aktørar. I tillegg til ekstern høyringsaktivitet, blei det i perioden gjennomført eit internt dialogmøte i fylkeskommunen. 8. juni blei utkast til planprogram drøfta i regionalt planforum.

Høyringsinnspela

Tilbakemeldingane har generelt vore gode, der fleire legg vekt på at det er positivt at fylkeskommunen no inkluderer naturmangfald, klimarettferd og folkehelse i planprogrammet. Samstundes har nokre uttalar etterlyst ei tydelegare skildring av nullutsleppsmålsetjinga i utviklingsplanen, og denne vert difor presisert i planprogrammet.

Høyringsinnspela syner også at det er store forventingar til kva ein regional klimaplan skal og bør vere. Det vert fokusert på korleis den regionale planen kan legge til rette for aktivitet i fylket vårt, spesielt i kommunane. Ambisjonsnivået er høgt, og det er store forventingar både til prosess, resultatet og verktøya for oppfølging. Ikkje alle forventingar kan dekkast, då det er nødvendig å gjere prioriteringar for å avgrense omfanget.

Høyringsinnspela er å finne under *Vurdering av enkeltinnspel* i høyringsrapporten. Korleis innspela er tatt med vidare i planprogrammet er presentert ved bruk av fargekodar. Dei fleste innspela er merka med mørkegrå farge, som betyr at dei er tatt til orientering, men ikkje medfører endring i planprogrammet. Mange av tilbakemeldingane vert rein orientering, samt ros, eller at tilbakemeldingane allereie var inkludert i høyringsutkastet.

Det er gjort mindre tekstlege endringar i planprogrammet, desse vert ikkje skildra som eigne avsnitt i høyringsrapporten. Større tekstlege endringar, presiseringar og definisjonar som har blitt skrive inn i vedtaksutkastet vert presentert i innleiinga til høyringsrapporten. Dette gjeld innspel om:

- ✓ Energisparing
- ✓ Karbonopptak, fangst og lagring
- ✓ Medverknadsprosess
- ✓ Klimavenleg landbruk
- ✓ Arealrekneskap
- ✓ Andre regionale planar

Tekstlege endringar i sjølve planprogrammet er vist med grøn skrift. Etter vedtak i fylkesutvalet vil planprogrammet gjennomgå ei grafisk oppdatering før publisering.

Dei føreslegne plantema vert ståande som i høyringsutkastet, og er:

- Reduserer klimagassutslepp med mål om netto nullutslepp innan 2030
- Reduserer klimafotavtrykket til Vestlandssamfunnet
- Trygt og robust Vestland
- Sikre naturmangfald
- Klimarettferd og folkehelse

Utgangspunkt for arbeidet – *netto nullutslepp*

Ei viktig presisering som er gjort medan planprogrammet har vore på høyring, og som no er oppdatert i planprogrammet, er ei nærare forklaring på kva vi meiner som «nullutslepp innan 2030» (strategi 2.1 i utviklingsplanen).

I vedtak av Berekraftig verdiskaping - regional plan for innovasjon og næringsutvikling i Fylkestinget 16.06.2021 blei nullutsleppsambisjonen noko tydelegare definert gjennom bruk av *netto null*-omgrepet. Både i høyringsprosessen til næringsplanen og klimaplanen har det blitt etterlyst ei tydelegare presisering på kva vi meiner med «nullutslepp». For å sikre at regionale planar samsvarar med kvarandre har fylkeskommunedirektøren lagt opp til å bruke nullutsleppsdefinisjonen frå regional plan for næring for arbeidet med regional plan for klima. Det vil arbeidast vidare med tydelege skiljer/grenser, og kva dette målet betyr for ulike sektorar i den vidare planprosessen.

Planprogrammet inkluderer difor no både bruken av omgrepet netto nullutslepp, samt definisjonen av omgrepet. Målet er framleis svært ambisiøst, samt samsvarar med nasjonal og internasjonal definisjon av netto nullutslepp. Utreiingar som er planlagt gjennomført i planprosessen vil også løfte fram ulike tiltakspakkar knytt til dette ambisjonsnivået, i tillegg til scenarioanalysen som ligg til grunn for verdiskapingsplanen.

Fylkesutvalet si rolle

Fylkesutvalet har det overordna ansvaret for tema klima, miljø og berekraft. Vidare er fylkesutvalet det overordna prosessorganet, og har soleis ei særleg viktig rolle i utarbeidinga av planen. Det er ikkje føreslått å ha eigen saksordførar for klimaplanen. Fylkesutvalet vil i løpet av planarbeidet få lagt fram prosess-saker, for å sikre forankring og gi retning på planarbeidet, jf. delegeringsreglementet. Dette i tillegg til at både regional og politisk samarbeidsgruppe (referansegruppe) vert nytta for å få innspel undervegs i prosessen, sjå kap. 6 Organisering av planprosessen i planprogrammet.

Etablering av ulike grupper

Arbeidet i dei ulike temagruppene og samarbeidsgruppene skissert under *Organisering av planprosessen* vil starte opp etter vedtak av planprogrammet. Fylkeskommunedirektøren ber om mynde til å invitere til, og etablere desse gruppene.

Vedtakskompetanse

Fylkesutvalet jf. delegeringsreglement pkt. 2.1.6 Regional plan, temaplan og strategi.

Vurderingar og verknader

Økonomi	Planarbeidet vil påverke budsjett og økonomiplan. Satsingane og tiltak som vert prioritert vert kopla til økonomiplanarbeidet, både som ledd i finansiering av vedteke handlingsprogram, samt oppfølging av klimabudsjett. Potensiell finansiell risiko ved ikkje å gjennomføre tiltak vil også kunne påverke økonomi.
Klima	Planen vil vise innsatsområda og tiltak Vestland skal prioritere for å legge klima og miljø som premis for samfunnsutviklinga, og nå ambisiøse klima- og miljømål.
Folkehelse	Planen vil inkludere folkehelse og sosial berekraft gjennom prioritert plantema; klimarettferd. Klimatiltaka skal ikkje berre sikre utsleppskutt og klimatilpassing, men tiltaka skal også bidra i innbyggjarane sin kvardag, livskvalitet og levekår.
Utviklingsplan for Vestland 2020-2024	Planen er vedteken utarbeidd i utviklingsplanen. Klimaplanen tek utgangspunkt i måla og strategiane i utviklingsplanen, FN sine berekraftsmål, og nasjonale føringar.

Konklusjon

Basert på høyringsinnspela som har komme inn gjennom skriftlege uttalt, samt munnleg i høyringsmøte, og vurderingar gjort i vedlagt høyringsrapport, er det ikkje gjort endringar av slik betydning at det er naudsynt med ei ny høyring Fylkeskommunedirektøren legg fram planprogram for Regional plan for klima 2022-2035 for endeleg vedtak.